

駱賓王文集

下

中華書局一九七三年
九月據清嘉慶丙子石
研齋秦氏重刊本影印

駱賓王文集卷第七

書啓

上廉使啓

上瑕丘韋明府啓

上郭贊府啓

上梁明府啓

上裴侍郎書

與程將軍書

荅貞半千書

與父老親情書二首

上廉使啓

賓王啓每讀書見古人負米之情捧檄之操未嘗不
廢書輟卷流涕傷心何則情蓄於中事符則感形潛
於內迹應斯通而悅帝力以栖覓情欣養素仰皇華
而暢息敢用披丹伏惟公源控玉輪激神濤而涵地

基䟽金闕架飛岳以韜雲洎乎鹿走周原霸燕圖於
即墨虵分沛澤封漢爵於華城福祿攸鍾公侯必復
炳靈丹穴襲吉黃裳若乃峯秀學山列三墳而仰止
瀾清筆海委九流以朝宗登小魯之山辨練光於亂
馬臨大吳之國識寶氣於連牛垂秋實於翰林絢春
花於文苑清規湛秀照月旦而彫談素論凝玄開夜
光於妙辨旣業成麟角引茅茹而彈冠道映鴛池絢
桃花而曳綬揆留皇鑒忠簡帝心奉職春宮標離光
於青殿代工天府明台耀於紫宸故得龍綽垂光戢
兩星而開照鶴蓋浮影翼五雲以連陰某大塊流形
小人餘慶幸河神入昴映白榆以䟽祥江使負圖泛

青蓮而薦兆薰風廣扇聖日揚輝進不能高議雲臺
談社稷之上務退不能銷形地肺揖箕穎之餘芳而
出沒風塵湮淪名利十年無棣萬里惟桑旣而日遠
長安出蓬門而西笑雲飄吳會遙松浦以南浮異塵
迹丘中絕漢機於俗網承歡膝下馭潘輿以家園不
悟地絡遐張維白駒於空谷天羅迥布弋黃鶴於高
雲願已駑鈇並從媒銜力農賤事未免東臯之勞反
哺私情遽切南陔之詠少希願復輒布懇誠雖噬臍
思歸空軫倚廬之望而嚙臂求仕非圖高蓋之榮明
公資孝履忠恕己及物惟機成務論道經邦庶得顧
兔離星動清風於舜海從龍潤礎霈甘雨於堯雲則

白羽書生自銘於食稻黃裳童子將賽德於食花拜
首廻遑傾心肅霽謹啓

上瑕丘韋明府啓

側聞觸籠戢翮負垂天而跼影伏櫪羈蹄望絕塵而
踈足故以遊蓮遇緲悟宋玉於嬰羅在藻迷波願蒙
莊於煦轍是以臨淄遣婦寄束蘊於齊鄰邯鄲下客
效處囊於趙相伏惟明府公締址瓊峯靈岳蔽丹霄
之景圖基珠溜神流沃清漢之波玉札飛文綜宏詞
於楚傳金籙緝藝味雅道於扶陽孕蘭畹而生姿澧
灞踵高門之慶產銅溪而寫鶚荆藍資象德之禎幼
辨羝羊演飛龍之祕策夙談孔雀對家禽之麗詞赤

野浮炫價之光珠胎瑩色丹穴悟來儀之迅鳳姿含
彩靈襟轉壁絢逸照於蘭池神府驚蘋韻清音於桂
浦談叢散馥韞餘氣於九蘭筆海流濤駭洪波於八
水於綰銅麟甸製錦鳧郊化浹下車恩孚攬轡德聲
含詠仁風飄十地之雄道化徧謠惠露灑三天之渥
狎中牟之馴雉豈懼驍媒驚重泉之瑞鸞非關照舞
雖則塵飛范甑垂銀有結綬之華而乃調理密絃烹
鷄屈涵牛之量加以招携白屋勸誘青襟遂使漱流
逸客望驥足以雲蒸棲泌遺才欵龍門而霧會某緯
蕭末品拾艾幽人寓迹雩壇挹危直之祕說託根磬
渚戢戰勝以良圖幸以奉訓趨庭東情田於理窟從

師負笈私情識於書林至於九流百代頗忽其異端
万卷五車亦研其奧旨將欲優游三樂負杖以終年
棲遲一丘鳴絃而卒歲諒以糟糠不贍甘旨之養屢
空簞食無資朝夕之歡寧展是以祈南陽之捧檄擬
毛義之清塵思魯國之執鞭蹈孔丘之餘志屬以蚤
秋應節鴈序戒時飈金將露玉俱清柳黛與荷紺漸
歇寔含毫振藻之際離經析理之期不揆彫朽之材
竊冀遷喬之路輒期泛愛輕用自媒儻荆璞無見致
疑夜光不逢按劍則沉骸九死終望銜珠殞首三泉
猶希結草載塵清矚跼影外慙冒瀆威嚴循心內駭
謹啓

上郭贊府啓

側聞承樞嘯谷韻清瀨於驚蘋震德昇乾彙玄枝而
布族雖涸鱗濡沫不缺望於鯨波而決羽搶榆頗思
遷於鸞樹伏惟公瓊基疊秀積珠構於三龍玉幹
薰暉瑤林於八桂仙飛有道滎河泛高尚之舟德
驗通神靈策動幽明之境產耶溪而濯質霜鐔廓
豐匣之姿孕鍾嶺而飛華虹玉絢荆巖之氣松秋
表勁翊潁霞而插極菊晚馳芳涵清露而沙沼鑒
懸龍鏡朗逸照於咸陽韻入鳬鍾驚洪音於長樂
心源泛藻控鰲壑以朝宗情嶽披蓮掩崑岑而作
鎮惠牛曜辨驚荀鶴於談叢楊鳳摛文詠鄒龍於
筆海故佐銅章於

彊渚側扇文鯨之風貳墨綬於桐郊潛誘祥鸞之化
絃揮單父弼清韻於稽琴化狎中牟翊馴翠於潘雉
加以延賓置驛接士軾廬采拔芻微邁欽賢於司隸
提獎幽滯軼取俊於淳于某甕牖輕生席門賤品幸
以叅名比屋稅康衢以自娛預迹耦耕欣日出而知
作又以家傳素業弋書林而騁志少奉庭闈踐文囿
以漁魂至於縹卷青緗頗側探其奧旨竹書石記亦
幽求其邃源雖未能叫徹帝閤聲馳宰府而頗亦見
推里閭譽浹鄉閭方今銀箭纏秋金壺應節吮墨翹
足期遙迹於一枝味道彈冠望橫經於重席不量庸
昧竊冀揚庭伏乞恩波暫垂廻盼儻使陳留逸調下

採柯亭之篠會稽陰德傍眷餘溪之蔡則迴眸之報
不獨著於前龜清亮之音誰專稱於往笛雖滄溟遠
量求不愧於牛涔而嵩岱洪恩終曾酬於蟻垤輕喧
視聽憂讐唯深猥瀆階庭兢惶交集謹啓

上梁明府啓

某啓昔者聞歌薛邑賞彈鋏於馮援佇駕夷門揖抱
關於侯子豈惟成風之斲妙思通神流水之絃清音
入聽況夫志合者蓬心可采情諧者蘭味寧忘伏惟
公儀天峙構曾基控射牛之峯浸地開源驚濤䟽釣
鰲之浦至夫封侯廟食掩金許以霞褰三主七公罩
袁楊而岳立於是功超振鷺位典烹鮮水鏡澄瀾照

翔鸞之舞影吟琴動操叶馴雉之雅音旣而盛德有
鄰佐皇華而撫俗君子不器扈輶軒以觀風某蒲石
摘遷聲鄉蓬轉不叶十室無專一經攀驥逸而無由
仰鵬飛而自失公顧眄成飾咳唾爲恩庶微潤於江
波異末光於鄰燭使幽禽遷木侶丹山於帝梧鳴石
在川應黃鍾於仙管敢布心也詎能望焉謹啓

上吏部裴侍郎書

武功縣主簿駱賓王謹再拜書裴公執事曰書不盡
言言不盡意然則理存乎象非書無以達其微詞隱
乎情非言無以筌其旨僕誠鄙人也頗覽前事每讀
古書高堂九仞曾參負北向之悲積粟萬鍾季路起

南遊之歎未嘗不廢書輟卷流涕霑衣何者情蓄於衷事符則感形潛於內迹應斯通是布腹心罄瀝肝膽庶大雅含弘之量矜小人惻欸之誠惟君侯察焉賓王一藝罕稱十年不調進寡金張之援退無毛薛之遊亦何嘗獻策于時高談王霸銜材揚己歷抵公卿不汲汲於榮名不戚戚於卑位蓋養親之故也豈謀身之道哉不圖君侯忽垂過聽之恩任以書記之事擬人則多慙阮瑀入幕則高謝郝超昔聶政荆卿刺客之流也田光豫讓烈士之分也咸以勢利相傾意氣相許尚且捐軀燕趙甘死齊韓今君侯無知於下官見接以國士正當陪麾後殿奉節前驅賈餘勇

以求榮效輕生而荅施逡巡於成命躊躇於從事者
徒以夙遭不造幼丁閔凶老母在堂常嬰羸恙藜藿
無甘旨之膳松檟闕遷措之資撫躬在亡何心天地
故寢食夢想噬指之戀徒深歲時蒸嘗崩心之痛弥
極若僕者固名教中一罪人耳何面目以奉三軍之
事乎况屬天倫之喪奄踰七月違膝下之養忽已三
年而凶服之制行終哀疚之情未洩興言永慕舉目
增傷夫怨於心者哀聲可以應木石感於情者至性
可以通神明故徐元直寸心以求辭李令伯陳情以
窮訴上以弃興王之佐命下以全奉親之篤誠而蜀
主不以爲非晉君待之逾厚此二者豈貪貧賤惡榮

華歆萬乘之交甘疋夫之辱也蓋有不得已者哉人有乾沒為心脂韋成性捨慈親之色養許明主以驅馳內忘顧復之私外存傳會之眷薄骨肉厚榮寵苟背恩而自效則君侯何以處之且義士期乎貞夫忠臣出乎孝子既不能推心以奉母亦焉能死節以事人假物議之無嫌實吾斯之未信也况流沙一去絕塞千里子迷入塞之冤母切倚廬之望就令歡以卒歲仰南薰之不貲而使憂能傷人迫西山而何幾君侯情深錫類道叶天經明恕待人慈心應物儻矜犬馬之微願憫驚雀之私情寬其負恩遂其終養則窮冤有望老母知歸再拜

與程將軍書

昨見武郎將備陳將軍之言恩出非常談過其實恭
聞嘉惠深用慙惶君侯懷管樂之材當衛霍之任豐
功厚利盛德在人送往事居元勲蓋俗智足以興皇
業道足以濟蒼生尚且屈公侯之尊伸管庫之士若
下僕者天地一無用芻狗耳粵自旌賁之辰即逢聖
明之厯材不經務不能成佐命之功智不通時不能
包周身之防加以天資木強不能屈節權門地隔蓬
心不能買名時議常願為仁由己喪我於吾見機可
以絕機無用之爲有用隨時任其舒卷與物同其波
流者矣其於木也班匠無措其鈎繩其於駕也良樂

無所施其銜策不悟聖朝發明敷之制君侯緝雍熙之道曲垂提獎廣借游談猥以樗櫟之姿忝預賢良之薦當今鴻都富學麟閣多英非游夏不可以昇堂非蔓牙不可以擊節儻使片言失德事暴區中匹夫竊議語流天下進乖得賢之舉退貽薄德之譏恐不肖之軀爲高明之累耳必能一眄增價九術先登燕昭爲市駿之資郭隗居禮賢之始則當效駑鈗之用飾固陋之心陶鑄堯舜之典謨憲章文武之道德上以究三才之能事下以通萬物之幽情勿使將詞翰爲行己外篇文章是立身歧路耳又何足道哉言而不慙者恃惠子之知我也所恨禁門清切造別無緣